



Mintgin ha mess ses accents – ils trais emprims presidents da l'URB: Dumeni Capeder, Cilgia Vital e Gian Guolf Bardola (da sanester).



La suprastanza actuala: Jachen Sarott, il president Jon Carl Tall, Lidia Deuber, Cornelia Livers e Ciril Berther. I manca Erica Vonmoos.

FOTOS C. CADRUVI

L'URB festivescha ses giubileum da 20 onns

Ils presidents raquintan da reminiscenzas e da resistenza

DA CLAUDIA CADRUVI / ANR

■ **Radund ina terza dals Rumantschs viva ordaifer il territori da tschep. Questas personas emprova l'URB da reunir – dapi ventg onns. La sonda ha l'uniun festivà ses giubileum.** Insatge dapli che ventg personas èn vegnidas a la radunanza annuala ed al giubileum da l'Uniun dals Rumantschs da la Bassa (URB). Sco president hajan ins adina tema d'avair fatg fauss insatge sch'i vegnian be paucas personas, ha ditg il president *Jon Carl Tall*. I dettia deplorablmain anc adina blers Rumantschs en la Bassa che n'enconuschian betg l'URB. «Tschertins èn fitg passivs.»

Cifras legraivlas

L'interess para dentant tuttina d'esser avant maun. Las cifras da commembers creschan onn per onn. Radund 800 personas – commembers, simpatisants ed uniuns grischunas – èn registradas tar l'URB e retschaivan quatter giadas l'onn il fegliet. Las reacziuns sin il fegliet musian che la gasettina, che relata d'occurrenzas rumantschas en la Bassa e davart publicaziuns novas, vegnia legida dapli che quai ch'ins crai, ha ditg Tall.

Il 2012 metta l'URB in nov accent en

ses program da lavur: inscuters interrumentschs che han lieu mintga mais (guarda fanestra).

Ina pitschna discussiun ha levantà il fatg che trais suprastants da l'URB ston ir quatter giadas l'onn a Cuira a pachetar la posta ed ils fegliets che la Lia Rumantscha (LR) spedescha per l'uniun. Ils suprastants impundian mitgamai in entir di – quai sper tut las autras sesidas da suprastanza. La radunanza ha proponì ch'ins duai tschertgar ina soluziun pli efficients cun la LR. Ils Rumantschs da la Bassa na disponian la finala da nagin center u secretariat sco las autras regiuns.

L'onn passà ha l'URB gì entradas da 12 446 francs ed expensas da 14 845 francs. La facultad efectiva è sa sminuida sin 21 106 francs. Il 2012 prevedan ins entradas ed expensas da mintgamai 12 300.

Reminiscenzas e resistenzas

Suenter la radunanza generala han ils trais anteriurs presidents da l'URB raquintà da reminiscenzas e resistenzas cunter l'uniun. L'emprim president da l'URB è stà *Dumeni Capeder* che sa regorda d'in discurs cun l'antierur cusseglier naziunal *Toni Cantieni*. «El aveva la medema visiun sco jau.» Numnadmain



Dapi ventg onns è el actuar e prelegia mintgamai minuziusamain il protocol: Jachen Sarott.

da pussibilitar buns contacts tranter ils Rumantschs d'ordaifer il Grischun. Ina pitschna gruppa saja sa messa a la lavur, raquinta Capeder. Ad ina radunanza da delegads da la LR hajan ins tschentà la dumonda sch'ina nova uniun affiliada en la Bassa fiss bainvegnida. La reacziun: Il tema na saja betg actual ed ins na paja

ganca in soli franc ordaifer il territori da tschep. «La resposta negativa da Cuira è stada ina trumpada e nus eran sin il precinct da chalar.» La finala n'hajan ins betg laschà starmentar e tuttina fundà l'uniun.

Mintga nov president saja s'occupà dad autras tematicas, ha ditg *Gian Guolf Bardola*, il segund president. I fetschia adina mal sche Rumantschs discurren ensemen tudestg. Ina mesira per ina meglra chapientscha sajan stads ils curs interrumentschs da Tista Murk a Turitg. Murk haja ditg che la differenza tranter il susilvan ed il ladin sajan be 200 plects. Sch'ins sappia quels, chapeschian ins tut.

In dals megliers meds per promover la chapientscha saja il Radio Rumantsch. En ses temp d'uffizi è Bardola s'engaschà ch'ins possia retschaiver quel en la Bassa. Cun rimnar suttascripziuns ed a pe cun il svilup tecnic saja quai plaunsieu reussi da pudair tadlar Radio Rumantsch da pertut en Svizra.

Onns a la lunga han ils suprastants da l'URB pajà las spensas e la sala per la radunanza ord l'atgna bursa. «Ils delegads da la LR eran da l'avis che quels da la Bassa sajan tuts milliunariss», ha ditg *Cilgia Vital*, la terza presidenta. Durant ses temp d'uffizi èsi reussi da persvader la LR

ch'era l'URB haja merità ina contribuiziun annuala. A partir dal 2003 pon era commembers singuls entrar en l'uniun. Avant era l'URB be l'organisasiun tetgala da tuttas uniuns grischunas e dals chors rumantschs da la Bassa.

Inscunter cun Martin Killias e Roland Vögli

Gievgia proxima, ils 7 da zercladur a partir da las 19.00 datti puspè la pussaivladad da s'inscuntrar en la Giesserei ad Oerlikon. L'URB envida tut tgi che discurra rumantsch da vegnir a star da cumpagnia. Questa giada è il criminolog e professor da dretg *Martin Killias* il giast da la saira. El vegn a raquintar da sias experientschas en la perscrutaziun criminologica.

L'accent musical porscha questa giada *Roland Vögli* da Scuol che lavura dapi trais onns sco redactor da musica tar RTR.